

# Акафист Пресвятой Богородице перед Ея иконой, именуемой «Знамение» Новгородская

## **Кондак 1**

Взбранной Воеводе, Владычице нашей Богородице, знамением иконы Ея святыя дивную победу людем Новаграда даровавшей, благодарственное возглашаем пение. Ты же, Всеблагая Заступнице наша, яко имущая державу непобедимую, от всяких нас бед свободи и от враг видимых и невидимых защиты, да зовем Ти:

Радуйся, Владычице, знамение милости Твоея нам являющая.

## **Икос 1**

Ангелов Царице и всея твари Владычице, Пречистая Дево Богородице, преславным знамением иконы Твоея святыя всю страну Российскую благодатно озарила еси и струи чудес от нея источила еси верным. Темже, со усердием и любовью припадающе ко пречестному Твоему образу, со умилением приносим Ти благохваления сицевая:

Радуйся, освященное селение Бога Слова; радуйся, благодатию Божиею и нас освящающая. Радуйся, спасению падшаго рода человеческого непорочно послужившая; радуйся, всех Творца и Господа, Чистая, Духом Божественным в ложе снах заченши, без истления родившая. Радуйся, Матерним Твоим попечением всех нас объемлющая; радуйся, в бедах и напастех скорая нам Помощнице. Радуйся, злыя страсти наша невидимо укрощающая; радуйся, в христианских добродетелех преуспевати нам помогающая. Радуйся, недуги наша безмездно врачующая; радуйся, на стези покаяния нас премудро наставляющая. Радуйся, Дево, христиан похвало; радуйся, яко блажат Тя вси роди.

Радуйся, Владычице, знамение милости Твоея нам являющая.

## **Кондак 2**

Видев озлобление Новаграда, крепце воюемаго от воев суждальских, святитель Христов Иоанн слезно моляшеся о избавлении и спасении града и услыша Глас свыше, да идет во храм Преображения Господня и, взем тамо икону Пресвятыя Богородицы, да изнесет ю на забрала града противу полчищ, его воюющих. Таковое веление Божие услышав святитель благодарственно возопил Спасу Христу: Аллилуия.

## **Икос 2**

Разумев волю Божию во гласе небеснем, святитель Христов Иоанн прииде ко храму Преображения Господня взяти икону Богоматере, и

егда моляшеся пред нею, подвижесе икона от места своего на рuce его честная, и той с пением молебным изнесе ю на забрала града, глаголя народу: дерзайте, Мати о Бога нашего с нами есть. Сего ради, видевше Твое к ним благоволение, в пришествии чудеснем иконы Твоея явленное, в песнях возглашаем благохваления сицевая:

Радуйся, Надеждо христиан ненадежных; радуйся, скорбящих Радосте и Заступление. Радуйся, беспомощным скорую помощь Твою являющая; радуйся, утесняемым ослабу и свободу дарующая. Радуйся, православным воином Предводительница к победам; радуйся, ратей неприятельских всекрепкое низложение. Радуйся, великий Новград благоволением Твоим осенившая; радуйся, на забрала его, яко Взбранная Воевода, во иконе Твоей пришедшая. Радуйся, ненаказанных милостивая Наказательнице; радуйся, неразумных премудрая Вразумительнице. Радуйся, обидящих всегрозная Устрашительнице; радуйся, обидимых Всеблагая Заступнице.

Радуйся, Владычице, знамение милости Твоея нам являющая.

### ***Кондак 3***

Силою Божиею укреплен, святитель Христов Иоанн вознесе святую икону Твою, Владычице Богородице, посреде самая брани, идеже стрелы от сопротивных, яко дождь, падаху, и едина от них честный лик Твой на иконе устреми; абие же икона Твоя лик свой от полков враждебных отврати и слезы от очес источи, ихже собирая в фелонь свою, святитель Христов Иоанн народом дерзати повеле, они же, яко крепка некоего хранителя имуща, на сопротивныя устремишася и до конца победиша тех, зовуще Господу Сил: Аллилуия.

### ***Икос 3***

Имеяше Тя воистину великий Новград Воительницу державную, Богородительнице Всеблагая, егда, паче надеяния, знамением иконы Твоея святые победити сильным полки сопротивных людем Новаграда помогла еси. Темже, пение победное Тебе приносяще, взываем сице:

Радуйся, умирение миру Святым Рождеством Твоим принесшая; радуйся, средостение вражды древняя разрушившая. Радуйся, неправедно враждующия наказующая; радуйся, знаменьями и чудесы Твоими христоролюбивыя люди утешающая. Радуйся, от стрелы вражия язву на лица иконы Твоея приемшая; радуйся, слезы благодатныя от нея дивно источившая. Радуйся, вои сопротивных слепотою и бегством поразившая; радуйся, полки крепкия безсильны соделавшая. Радуйся, во бранех крепкая Помощнице; радуйся, врагов посрамление. Радуйся, люди Твоя Дивною победою увенчавшая; радуйся, Непобедимая Воеводо вождей и воинств христианских.

Радуйся, Владычице, знамение милости Твоея нам являющая.

### **Кондак 4**

Буря недоумения смущает ми ум: како возмогу недостойными усты воспети чудеса Твоя, Богомати Владычице, яже святою иконою знамения Твоего в Новеграде явила еси, даровав ю в помощь и заступление всем православным людем от враг видимых и невидимых? Темже, величающе неизчетныя милости Твоя к нам смиренномудренне воспеваем прославльшему Тя Сыну Твоему и Богу: Аллилуия.

### **Икос 4**

Слышавше о дивнем чудеси святыя иконы знамения Твоего в Новеграде, Пречистая Дево, како людие новоградстии, имуще сию, силою Твоею и пособием Божественнаго зрака Твоего преславное одоление на сопротивныя показаша, со благоговением и радостию поклоняемся сему чудному образу Твоему и хвалебне зовем Ти:

Радуйся, Невесто Отца Безначальнаго; радуйся, неискусобрачная Родительнице Превечнаго Слова. Радуйся, селение прекрасное Духа Святаго; радуйся, Живоначальныя и Единосущныя Троицы благодатию осененная. Радуйся, древле пророки многообразне предреченная; радуйся, Ангельския соборы чистотою Твоею превозшедшая. Радуйся, человеческого рода возвышение; радуйся, падших сынов Адамлих благодатное возстание. Радуйся, яко из Тебе в плоть облечеса одевайя небо облаки; радуйся, яко млеко Твоим питала еси Питателя вселенныя. Радуйся, Всеблагословенная Богородице, Чистая Приснодево; радуйся, Радосте наша и спасение душ наших. Радуйся, Заступнице наша, от Бога нам дарованная; радуйся, всех верных ограждение и священное прибежище.

Радуйся, Владычице, знамение милости Твояе нам являющая.

### **Кондак 5**

Богосветлая звезда – икона знамения Твоего, Богородице Дево, великий Новград сиянием многих чудес духовно просвети, неоскудно источающи благодатныя исцеления всем верным, со усердием к ней притекающим. Не лиши и нас благодатнаго Твоего озарения и милосердных щедрот Твоих боголепным поклонением чествующих чудотворную икону Твою, да благодарственно воспеваем Богу: Аллилуия.

### **Икос 5**

Видевше чудеса преславная, от иконы знамения Твоего бывшая, Владычице Преблагая, людие Новаграда со усердием к ней притекаеху и в недужех своих исцеления благодатная от нея приемляху. К нейже ныне приходяще, поклоняемся, и чествуем, и от желания сердца целуем, исцелений благодать почерпающе, и недуг телесных, и душевных страстей свободждаемся, зовуще Ти и глаголюще:

Радуйся, скорбящих Радосте и обидимых Заступнице; радуйся, печальных Утешение и бедствующих помощнице. Радуйся, болящих

немздоприимная Целительнице; радуйся, нищих и убогих некрадомое богатство. Радуйся, терпеливых страдальцев дарами благодатными ущедряющая; радуйся, отчаянных и безнадежных от рова погибели избавляющая. Радуйся, вдовиц и сирых благосердая Попечительнице; радуйся, целомудрия и воздержания юных Наставнице. Радуйся, старцев благоговейных сладкое Успокоение; радуйся, стариц боголюбивых тихое Прибежище. Радуйся, кающихся грешников верная Споручнице; радуйся, даров духовных щедрая Подательнице.

Радуйся, Владычице, знамение милости Твоея нам являющая.

### **Кондак 6**

Проповедует Новград преславное заступление Твое, Пречистая Владычице, како во дни нашествия врагов сильных и вооруженных от святых иконы знамения Твоего помощь Твою благодатную людям Твоим даровала еси, враждебныя полки со студом вспять обратила еси, град же Твой цел и невредим от них сохраниши, да вси поют Спасителю Богу: Аллилуия.

### **Икос 6**

Возсияла еси лучами великих чудес в Новеграде, Богородице Дево, и икону знамения Твоего благодатным источением слез дивно прославила еси, неизчетныя милости от нея щедро подавающи всем скорбящим, и обремененным. Посети убо и души наша, недугующия страстьми греховными, Госпоже Всеблагая, и буди нам Помощница во спасение, да благодарственно Тебе зовем:

Радуйся, Молитвеннице благоприятная за нас к Богу; радуйся, Предстательнице всемогущая, гнев Божий на милость прелагающая. Радуйся, руке Твои богоносне на умоление ко Творцу выну простирающая; радуйся, яко Мати Сына, Судию Праведнаго, о всем мире умоляющая. Радуйся, покровом Матерняго Твоего заступления всех нас покрывающая. Радуйся, сущих в бедах и скорбех благодатию смирения и терпения снабдевающая. Радуйся, страждущия и безпомощныя невидимо укрепляющая; радуйся, болящия и безнадежныя от одра болезни возставляющая. Радуйся, верою молящимся Тебе великия милости являющая; радуйся, во благих прошения наша дивно исполняющая. Радуйся, струи благодатных исцелений обильно нам источающая; радуйся, всем вся полезная дарующая.

Радуйся, Владычице, знамение милости Твоея нам являющая.

### **Кондак 7**

Хотящи явити, Владычице, не токмо Великому Новуграду, но и всему православному Российскому жителству преславныя чудеса Твоя от иконы знамения Твоего, сию во многих градах, обителех и весех от лет древних до дний наших дивными чудесы прославила еси: слепым прозрение, расслабленным укрепление и многим болящим исцеление

милостивно от нея дарующи и сим подвизающи люди величати Тя, возвеличившую род наш, и пети Христу Богу: Аллилуия.

### ***Икос 7***

Новград и всю землю Российскую дивная икона знамения Твоего, Богородице Дево, чудеса благодатными осия, милости Твоя богатыя верным проявивши. Сию убо боголепным поклонением чествуяще, хвалебне Тебе, Владычице, зываем:

Радуйся, скоропредстательная Помощнице усердно к Тебе притекающих; радуйся, благосердая Услышательнице молений наших. Радуйся, великий Новград благословением Твоим осенившая; радуйся, в пределех его икону Знамения Твоего чудеса прославльшая. Радуйся, дев ликостояния прославлением иконы Твоея духовно возвеселившая; радуйся, всеильными Твоими к Богу молитвами и нас ко блаженству райскому возводя. Радуйся, за всех нас милостивая к Сыну Твоему и Богу Ходатаице; радуйся, ведущим брань противу мира, плоти и диавола добрая Споспешнице. Радуйся, вся страны православныя покровом милости Твоея осеняющая; радуйся, многих мест и обителей сокровище исцелений неоскудное. Радуйся, иноков и инокинь благоподвизающихся всемогущая Покровительнице; радуйся, и в миру благочестно живущих усердная Заступнице.

Радуйся, Владычице, знамение милости Твоея нам являющая.

### ***Кондак 8***

Странствующе в юдоли сей земней, многоскорбней и многомятежней, горняго града – Иерусалима Небеснаго зыскуем и Тебе, Владычице, молим: путеодствуй нам по стези заповедий Христовых и сохрани нас от падений греховных, удиви на нас милость Твою и осени нас Твоим заступлением, да, Твоею помощию спасаеми, сподобимся купно со всеми святыми воспевати: Аллилуия.

### ***Икос 8***

Всех скорбящих Утешительнице и бедствующих Помощнице, Всеблагая Богородительнице, не презри нас, припадающих к Тебе пред пречистым образом Твоим, но посети нас милостивно щедротами Твоими: и, якоже древле отцем нашим помощь Твою державную явила еси, тако и нас, смиренных, не лиши Твоего заступления во время благопотребно, да не постыдимся во уповании нашем, еже по Бозе крепко на Тя возлагаем, и зовем Ти:

Радуйся, Богосветлая свеще, светом Христовым озаряющая верныя души; радуйся, многоценный алавастр, миром Божию благодати умащая боголюбивыя сердца. Радуйся, умнаго Солнца Мати верныя просвещающаго, неверныя же помрачающаго; радуйся, славо небесных и упование земных. Радуйся, Надеждо наша и Заступнице всех притекающих к Тебе с верою; радуйся, любящая и чтущия Тя от всяких бед избавляющая. Радуйся, обетовании благими души верных

благодатно веселящая; радуйся, девственных ликом славо и похвало. Радуйся, подвижников благочестия к горнему Сиону путевождующая; радуйся, верных к Небесному Иерусалиму приводящая. Радуйся, омраченныя сердца светом истиннаго боговедения просвещающая; радуйся, и всех нас благодатными лучами великия Своея милости покрывающая.

Радуйся, Владычице, знамение милости Твоея нам являющая.

### ***Кондак 9***

Все ангельския воинства благоговейно Тебе служат, небесе и земли Царице, человеческий же род немолчныя хвалы Тебе приносит, горних и дольних Владычице, и Твою святую икону поклонением досточестным почитает. Сию бо во отраду и утешение нам даровала еси, Всеблагая, и знамения Матерния любви Твоея оною нам присно являеши, да поем Тобою благодееющему нам Богу: Аллилуия.

### ***Икос 9***

Ветии суемудреннии человечестии не могут постигнути Божественную тайну приснодевства Твоего, Марие Богородице, како в рождестве и по рождестве ключи девства Твоего целы сохранила еси, ангелом и человеком удививши. Темже Тя благочестно Матерь и Деву исповедующе, присно Тя ублажаем и хвалебно Тебе воспеваем:

Радуйся, возвеличившая род человеческий непорочно Твоею чистотою; радуйся, освятившая землю всесвятим Твоим рождеством. Радуйся, девство и рождество в Себе дивно сочетавшая; радуйся, во обою непорочно Себе сохраняющая. Радуйся, велие вселенныя чудо; радуйся, непостижимая человеческими умы тайно. Радуйся, ангельских ликом удивление; радуйся, святых Божиих угодников присное радование. Радуйся, мира горняго первейшее украшение; радуйся, мира дольняго благонадежное заступление. Радуйся, демонов низложение; радуйся, ада поправление.

Радуйся, Владычице, знамение милости Твоея нам являющая.

### ***Кондак 10***

Спасителя падшему человечеству родила еси, Пречистая Дево, и Сего яко Младенца во объятиих Твоих носила еси, Егоже Божественное изображение и на иконе знамения Твоего нам являеши и многия милости и щедроты Твоя нам даруеши. Сего ради со благоговением и верою чествуем образ чудотворный Твой, Владычице, и молимся Тебе прилежно: буди нам Покров и защита в день Судный, да Твоим Матерним предстательством помилует нас Судия Праведный, Сын Твой и Бог, и сподобит нас деснаго стояния и пения Ему со избранными: Аллилуия.

## **Икос 10**

Стена необоримая и источник чудес икона Твоя святая явися, Богородице Дево, не токмо великому Новуграду, но и всей стране Российстей. Сию, яко знамение победное, имуще, воинства православныя врагов побеждают, и святителие ею благоукрашаются, и всяк возраст верных утешение благодатное от нея приемлет. Утеши и нас Твоим, Всемилостивая Владычице, благоволением и милостию, да хвалебно взываем к Тебе:

Радуйся, крепкое наше Упование; радуйся, несумненная наша Надежда. Радуйся, великаго Новаграда многопетая славо; радуйся, страны нашея благодатное ограждение. Радуйся, во дни брани победительная на враги Помощнице; радуйся, во дни мира ко благочестию добрая Наставнице. Радуйся, иноческих обителей покров и снабдение; радуйся, благочестивых домов и супружеств благословение. Радуйся, девства и чистоты Поборнице; радуйся, обидимых и гонимых Предстательнице. Радуйся, нагих одеяние; радуйся, болящих исцеление.

Радуйся, Владычице, знамение милости Твоея нам являющая.

## **Кондак 11**

Пение наше смиренное не презри, всемилостивая Царице, и утробу щедрот Твоих не затвори нам, всещедрая Владычице: се бо, обнищавше в добрых делех, к сокровищнице милости Твоея, чудотворней иконе Твоей, со усердием притекаем, Всеблагая, и, припадающе, молимся: озари нас светом Божественныя благодати Твоея и научи нас верно исполняти заповеди Сына Твоего и Бога, да достойно возможем пети Ему: Аллилуия.

## **Икос 11**

Света невечерняго приятелище, светлыми лучами чудес Твоих просвещаеши нас, помраченных греховною мглою, Богородительнице Пречистая, и приводиши к немолчному славословию Твоего Пресвятаго имене. Знамением иконы Твоея святыя воистинну явила еси воеводство Твое державное, Госпоже Всеблагая, егоже светло празднующе, радостно зовем Ти:

Радуйся, возвеличенная Богом паче земных и небесных; радуйся, едина Чистая и Благословенная в женах. Радуйся, Царице и Владычице небесе и земли; радуйся, порфиро Царя царей. Радуйся, чертоже безсеменнаго уневещения; радуйся, главизно спасения человеческого. Радуйся, уповающая на Тя несрамляющая; радуйся, просящая Твоея святыя помощи от бед избавляющая. Радуйся, столпе и утверждение девства; радуйся, щите и ограждение веры православныя. Радуйся, боголепное украшение Святыя Христовы Церкви; радуйся, покрывающая всех нас Матерним Твоим покровом.

Радуйся, Владычице, знамение милости Твоея нам являющая.

## **Кондак 12**

Благодать и милость свыше подаждь нам, Владычице, от иконы Твоя святыя, юже в знамение заступления Твоего нам даровала еси, чудесы, от нея бывающими, православную веру в нас утверждаючи, неверие же посрамляючи. Темже поклоняемся Тебе и молимся: в Православии соблюди нас, Всеблагая, и сподоби до конечного дыхания нашего верно пети Богу: Аллилуия.

## **Икос 12**

Поюще чудеса Твоя от иконы знамения Твоего явленная, Богородице Дево, хвалим, славим и величаем Тя, Честнейшую воистину Херувим и Славнейшую без сравнения Серафим. Ты же, Всеблагая Заступнице наша, покрый нас державным Твоим покровом и избави нас от всяких бед и искушений вражиих, да воспевает Тебе непрестанно гласом хваления:

Радуйся, Богообрадованная и непорочная Приснодево; радуйся, нетленная и неискусобрачная Агнца и Пастыря Мати. Радуйся, увенчанная диадимую царскою от Троицаго Бога; радуйся, святолепная и светоносная палато святых Святейшаго Слова. Радуйся, одесную стоящая Сына Твоего и Господа; радуйся, всегда молящаяся Ему за род христианский. Радуйся, Виновнице благодатнаго человеков обновления; радуйся, кающихся грешных к Богу примирение. Радуйся, страждущих от бед Избавление; радуйся, Взыскание погибших. Радуйся, телес наших врачевание; радуйся, душ наших спасение.

Радуйся, Владычице, знамение милости Твоя нам являющая.

## **Кондак 13**

О Всепетая Мати Сладчайшаго Спасителя нашего, Господа Иисуса Христа! Нынешнее наше приемши приношение, от всякия избави нас напасти и скорби, и вечныя изми муки всех пред святою иконою Твоею с верою и любовию поклоняющихся и о Тебе благодарно зовущих Богу: Аллилуия.

*(Этот кондак читается трижды, затем икос 1 и кондак 1)*

## **Молитва**

О Пресвятая и Преблагословенная Мати Сладчайшаго Господа нашего Иисуса Христа! Припадаем и поклоняемся Тебе пред святою чудотворною иконою Твоею, воспоминающе дивное знамение Твоего заступления, великому Новуграду от нея явленное во дни ратнаго на сей град нашествия. Смиренно молим Тя, Всесильная рода нашего Заступнице: якоже древле отцем нашим на помощь ускорила еси, тако и ныне нас, немощных и грешных, сподоби Твоего Матерняго заступления и благопопечения. Спаси и сохрани, Владычице, под кровом милости Твоя Церковь Святую, град Твой, всю страну нашу

православную и всех нас, припадающих к Тебе с верою и любовью умиленно просящих со слезами Твоего заступления. Ей, Госпоже Всемиловитая! Умилосердися на ны, обуреваемыя грехи многими, простри ко Христу Господу Богоприимныя руке Твоя и предстательствуй за нас пред благостию Его, просящи нам прощения прегрешений наших, благочестнаго мирнаго жития, благия христианския кончины и добраго ответа на Страшнем суде Его, да, спасаеми всеильными Твоими к Нему молитвами, блаженство райское унаследуем и со всеми святыми воспоем пречестное и великолепое имя Достопоклоняемя Троицы, Отца и Сына и Святаго Духа, и Твое велие к нам милосердие во веки веков. Аминь.